

عالم نافر

شعر

عمرو حسنى

295

أصوات أدبية

أصوات أدبية

سلسلة أسبوعية

تعنى بشرا الإبداعات المصرية

الهيئة العامة لقصور الثقافة

• عالم تانى - 295 - شهر - عمرو حسنى

• الطبعة الأولى - مايو 2000

باسم مدير التحرير على العنوان التالى :
١١ ش أمين سامى - القصر العينى
القاهرة - رقم بريدى : ١١٥٦١

البريد

عالم تانی
.. شعر

رئيس مجلس الإدارة
علي أبوشادي

أمين عام النشر
محمد كشيك

الإشراف الفني
د. محمود عبد العاطي

رئيس التحرير
محمد البساطي

مدير التحرير
جرجس شكري



میراث

- أنا مش حاسيب حقى

حاقسم معاك الحصان

واقسم معاك الكاريتيه

وحاقطعه حته حته

- أنا تحت أمرك يا خويا

خد الحصان لو يناسبك

وسيب عشانى الكاريتيه

- إنت فاكرنى برياله

والا حاتعملى ناصح؟

أنا حاعمل ايه بالحصان من غير كاريتة أبويا؟

حاقسم معاك الحصان

واقسم معاك الكاريتيه

- رَوِّقْ كِدا اَمَّالْ شُويَه
شُوفِ الحِصانِ يَسْوى كَامِ
وانا خَتَّ اَمْرِكْ يا سِيدِي

- ما اقبِلْشْ مَنَّكَ فِلْوسِ
ولا خِزائِنِ قارونِ
خَرَقْنِي نارِ المِجْوسِ
لو كُنْتَ ابِيعْ شَعْرَه مِنْه
مايْبِيعُشْ رِيحَه اَبُوَه اِلا عَدِيمِ الاَصْلِ
إِلا الخَسِيسِ الجِبَّانِ
حاقِسمِ معاكِ الكارِيتَه
واقِسمِ معاكِ الحِصانِ

- طِبْ شُوفِ اَنَا حَقِي كَامِ؟
وانا راضِي بِاللِي تَقُولُه

- عَامَلِّي فِيها ضَحِيه

طب ما انت عارف ظروفى

والا عايزنى استلفلك؟

والآ أبيعلك عيالى؟

المسألة واضحة جداً

بطل مناوره ومداوره

عايز حقوقى وبس

لا زايد ولا ناقصه حته

حاقسم معاك الحصان

واقسم معاك الكاريتيه

- فوّضت أمرى لربى

غلب حمارى معاك يا ابن أمى وأبوى

خدّهم وقلبى مسامحك

- ما اقبلش منك عطايا

والآ انت فاكّر يا شاطر تقدر تبقّشش عيالى؟

بطلّ ماطله وزور

حاتلف أو حاتدور

حقك حتاخده وحقى

حاخده بحد الساطور

حاقسم معاك الحصان

واقسم معاك الكارته

وحاقتطعه حته حته

ودمه..

حايسيل بحور

عالم خاندي

إلى ابنتي محمود وبنتي ليلى

عبد الناصر
ماشى فى ميدان المنشيه
لابس بدلة جيش جريانه
ومطوّل دقنه
رابط فوق الجزمه علم أمريكا
رافع إيده
وفد الايد التانيه كيس نايلون
جواه كام عقب سجاره ونص رغيف ناشف
ماشى بيخطب فى الناس
”يا إخوانى
الاستعمار هوّ راس الحيه“
وماحدث سامعه
العربيات بتزمر له

والعواجيز فى الترمای بتبص عليه بعيون بهتانه
وعيال من عمر ولاد أولاده
لابسين برانيط وجاكتات وتيشترتات وعليها علم
أمريكا
وأسامى رؤساء أمريكا بيسبقهم قلب
من كتر ذهوله كان ماشى مبلم
وطلع ع الكورنيش
وفضل ماشى لحد الأنفوشى
وقعد قدام البحر فى قلعة قايتباى
والموج مجنون فى يناير كان بيطرطش على وشه
ولا هو هنا
بعد شويه
لقى حواليه هوجة أبطال على زعماء من جيله
ومن أجيال تانيه
جيفارا على نهرو ولومومبا على غاندى على
أبصر مش عارف مين
كان يعرف معظمهم شخصياً

لكن قبل ما يفرح بوجودهم

خد باله

إن دقونهم كانت برضه طويله ولايسين هلاهيل

اللى معلق فى رقبتة صندوق ورنيش

واللى معاه كرتونة مناديل

وف وسطيههم راجل شيك لابس بدله سبور

بيضا أليظه

وفوق راسه لبه نيون ملفوفه زى سميظه

وقفهم فى طاير قدامه

وشخط فيهم.. بس بحتيه

جالكو كلامى؟

مش قلنلكم؟

كنتم طالبين إسبوع سبتلكو سنه بحالها

وآدى آخرتها

...

وأخدهم وياه من غير صوت

قلعهم كل هدومهم

بدل الجيش الجريانه وأكياس الخيش
ورموا عليها الأكياس النابلون على صناديق
الورنيش

وسبته اللب وكراتين المناديل
ومشى قدامهم بالبدلة وهمّا عرايا

.....

كانوا صف طويل سقعان
داخل جوا البحر بيغرق فى النسيان

حوار

- مالك يا بئينه؟
بتبصى كدا ليه؟
أنا أحمد... أحمد جوزك
- إنت أكيد الجننت
أنا إسمى خديجة
وانت اسمك حمدان
وأنا عمرى ما كنت مراتك
- مش ممكن فوقى لنفسك
بطلى تخريف
بأماره حتى الوجهه اللى فى ضهرك
- إنت حاستعبط؟
دى مش وجهه يا حمدان
دى لسعة نار من تعذيبك فيا

والا نسيت لما كنت بتتلذذ وانت سكران وبتطفي
في لحمي سجاييرك

- أنا عمري ما شريت سجايير ولا خمره
أنا مش حمدان
إسمي أحمد عبد العال حسنين
وآدي بطاقتي الشخصيه

- كان غيرك أشطر
إياك ناوي تعمل فيها محاسب والا مدرس ثانوي؟
إنت نسيت ان انت مزور

- عيب يا بئينه
أنا أستاذ في الجامعه

- مشكلتك إنك بتصدق نفسك
- طيب آدي بطاقتك إنتي، وآدي باسبورك، وآدي

رخصة عربيتك، وأدى شهادات ميلاد أولادنا..

- أما تلاقيح وبجاجة.. أوراقك كلها مضروبه

مالهاش أى أصول رسميه

يللا يا شاطر.. لعب غيرها

- طب يللا نروح القسم

- كله إلا دا، إنت حاستهيل؟

إنت نسيت إن انا وانت قاتلين ستاشير واحد

وعلينا أحكام بالإعدام؟

أمال يعنى إيه اللي حدفنا هنا فى الكوخ

المهجور ده على شط البحر؟

- دا مش كووخ يا بئينه، دا شاليه، واحنا هنا

بنصيف

- بطل بقى تضحك على نفسك، حد يصيف

فى عز السقعه؟
أمال بالذمة ليه لابس بالطو وانا متكلفته
والرعيته حاتقتلني؟

- أنا سقعان. سقعان يا بئينه. عيان.. وانتى
عندك حمى.. من ساعة مائزلنا البحر امبارح بالليل
علشان نصطاد الكنز الغرقان. وفى إيدنا خريطة
قديمه وسخه ومليانه بقع. لقيناها مرميه وسط
زباله بيعف عليها الدبان
أنا سقعان
سقعان يا بئينه
وبقيت مش عارف.. مين فينا الغلطان

مجهول

إسمى الأستاذ مجهول
كل قضايا البشريه الغامضه
متقيده ضدى
ويكون معلوم.. يا حضرات المستشارين
أنا مش مذنّب
دا استقصا
إنتم حاطينى في دماغكم
كل كلامكم مبنى للمجهول
من أول قيدت الواقعه
حتى أقفل هذا المحضر
العجز الموجود فيكم هو اللى عملنى كبش فداء
أول ما الواحد منكم يتعب ويجوع
والساعة توصل لاتنين بعد الظهر
مهما كان الموضوع

يقفل كل ملفات الخلق ويحشر فيها كل الورق

الموجود قدامه

ويرمى التهمه عليا بكل برود

ويقول:

قيدت الواقعه ضد المجهول

ويروح يتغدى

بس أنا مش حاسكت

حاستأنف

حاعمل نقض وإيرام

وحافجر قنبلة الموسم

علشان عندي دليل لا يمكن إنكاره لبراءتى

إن أنا أصلا..

مش موجود

حضرت الجليل

تمثال جليد
فوق الجبل في آلاسكا
راجل وست بشعرها المجدول
ويحضنوا بعض في أمان
نحته هناك عابر سبيل مجهول
عابر سبيل سقعان

.....
لحظة دفا

وسط التلوج والزمهرير
محفوظه في تلاجہ قطبيه
ولما ييجى الربيع
كل الحياة حواليه تفور
موسم دفا

موسم تزواج للديابه والأرانب والطيور
وهو حيدوب تحت شمس ضعيفه عيانه
ويبقى جدول ميه
تنساب على صخور الجبل
رايحه هناك للقاع
رايحه لأمواج نهر هادر
كاسح فى مجراه كل شىء

البحر

كان البحر بعيد جداً
وانا وانت شايقينه وماشييين
لابسين بدل السجن الزرقا
وايدينا فيها كلابشات رابطانا سوا
مع إننا مش أصحاب
جت قرعتنا نترحل مع بعض
وفـ أول لحظه
من غير ولا كلمه
بصينا لبعض..
ونطينا سوا م القطر

....

دلوقتي بنجری زی المجانين
بنجرجر بعضينا وبتحز السلسلة في إيدينا
رجلينا الخافيين كل ما يلسعها الرمل

نمد الخطوات
والبحر يبعد كل ما بنقرب منه

..

كنا بننهج
سامعين في وداننا صوت زمجرة الحراس وكلاب
السجن السعرائه
بنمد الخطوات
وينحلم بمراكب واقفه بتستنانا

..

دلوقتى الشمس بتغرب
والرملة بقت دافيه وما بتلسعش
بس الهوا بقى بارد وعنيف
واحنا ما كناش لابسين غير بدل السجن الزرقا
وما كناش أصحاب ولا حاجه
لكن حاتموت م الإرهاق والسقعه
وما كناش فى قدامنا
لما وقعنا على الأرض
إلا إننا ...
نحضر بعض

ملیٹ

راجل عجوز عايش لوحده
فى جزيرة فى قلب المحيط
ساكن فى كوخ خشب بسيط
بناه بنفسه من حوالى عشر سنين
جايز يكون عشرين سنه
تلاتين سنه
أنا فى الحقيقة نسيت
أنا أصلى عايش برضه فى جزيرة
بعيده عنه شويه
وبنيت عليها زيه كوخ
من يوم ما غرقت بينا مركبنا زمان
ودا كان
فى أوله عاصفه تقابلنا
واحنا فـ طريقنا فى رحله مش عارف لفين

يظهر نسيت

وكل واحد منا عام ساعتها بالعافيه

لحد شط جزيرته

وانا فاكر إني لقيت

على الجزيره بتاعتي

نضاره مرميه

فى وسط خرده من بقايا موقعه حريه

ومن ساعتها

وانا باراقبه كل يوم

.. من غير ما هو يشوف

کلب کانیش

كلب كانيش مطرود
من بيت ناس بهوات
شعره الأبيض لونه اسود
وعينه فيها ذل بجد
صبح وليل مرعوب
فى النور كان مفضوح
واما الدنيا تضلم
على فين يا بنى يروح؟
تحت عينيه لون غامق
وكأنه ما بينامش
عينه جت فى عينيا
قرب منى ما خافش
قاللى من غير صوت:
أنا باتمنى الموت

طشاش

فرحان على إيه؟
دانت يا دوب شايف قدامك بالعافيه
تقريباً أعمى
لكن ماشى بتضحك
وماحدش قالك نكته
وماحدش بيزغزغ فيك
ومافيش فى جيوبك إلا نص جنيه
تقدر تشرحلى بتضحك ليه؟
المفروض إنك تبكى
لأنك لسه واكل علقه محترمه قوى
ساعة مآ عاكست البت بتاعة الكشرى
بتقول إيه؟
أنا مين؟

أنا واحد أعمى زيك بالضبط

لكن مش مبسوط

بعد سماع الصفّاره

من كثر الإحساس بالوحده
باتكلم من بيتى بالتليفون
باطلب نمرتى في المكتب
بيرد عليا صوتى فى الأنسرماشين:
- أنا عمرو. أنا مش موجود دلوقتى
من فضلك سيب اسمك، تليفونك، ورسالتك
بعد سماع الصقاره
وبارد على صوتى وياقول:
- يا عمرو أنا عمرو
من فضلك بعد ما ترجع للمكتب إبقى كلمنى
في البيت..
لو ما لقتنيش إبقى سيب لى رساله ع الأنسر
ماشين

واهو خلىنا نحاول
جايز واحد منا يعترع الثانى ف يوم
ويحكيه ع اللى ف قلبه

الموجه

قدامك جاى شتا
وانت قاعد لوحذك
فى جزيرة فى المحيط
مامعاكشى غير جاكته
وايديك متبته
على صوره باهته
لواحد يشبهك
ودقنه منبته
وحاضن طفله شقرا
وطفل أسمرانى
شبه الإله أبوللو
وانت قاعد تقولّه
حكايات غريبة جداً

عن شمس بتستخبي

جوا ورق الجرايد

عن عازف البيانو

اللى ما عندوش إيدين

وف قلبه سيمفونيه

يعزفها ازاي وفين؟

عن كلبة الجيران

عن ديب مالهوش سنان

عن بنت جميله جداً

لكن مالهاش أمان

قدامك جاي شتا

وانت قاعد لوحذك

الموجه حاتيجي تاخذك

لأرض مش بعيدة

فيها كل الأحبة

تمثيل من الحجر

كلمهم واشتكيلهم

اغسلهم من دموعك

زَعَقَ فيهم وصرّخ

مسيرك لما تتعب

حاتبقى زيهم

تمثال من الحجر

ميت من الضجر

والموجه حاتيجي تانى

بعد سنين أو ثوانى

ومعاها غريب جديد

استرحام

خمسين سنه

وانا باحاول أكتب استرحام

وكل ما اكتب سطر فيه

أكرمش الورقة واقطّعها

”يا سيدي المارد أنا فـ عرضك“

أقول لنفسى:

بلاش تذل ياواد فى نفسك

..

”يا أيها الجبار أنا غلطان..“

لأ.. لأ.. ما ينفعشى

كدهه حاتبقى معترف قدامه بجرمه ما

عملتهاش

وهكذا وهكذا

سنين تفوت ما باعدهاش
خمسين سنه
باكرمش الورقه واقطعها
والنهاردة فجأة ما اعرفش ليه؟
أخذت بالي من حوالى خمس دقائق
إن العقوبة بتاعتى خلصت من زمان
وانا لسه قاعد جوا نفسى جوا زنزانتي
باكتبله فى استرجام
واقطع الورقه
ما اكملهاش

خدا

الحيط مشقوق

جواه حشرات بتنام فى الشتا..

وبتطلع فى الصيف

.....

لما عزلنا من البيت

جم ناس تانيين

ركبوا فى الأوضة تكيف

فضلت فى الحيطه الحشرات

....

ماتت جوا الشق

مشوار

أنا وانتى ماشيين فى الشارع
والدنيا فى سابع نومه
ومش عارفين رايحين على فين
ماسكين شنتط السفر الفاضيه فى إيدنا
والشارع بياخدنا لميادين واسعه ومبلوله
والعربيات راكنه جنب بيوت دفيانه
مستنيه الناس اللى حركبوا فيها الصبح
وبقى لنا أكثر من إسبوع ماشيين
لكن ما بيطلعش الفجر علينا
علشان أنا وانتى عميان

عالم

قاعدا على المكتب حزين
عملت بالقطن السحاب
وبقرص أسبرين
حطيت قمر بديع
وباكتئاب
دلقت كباية عصير
عملت بحر برتقان
النملة طلعت فوق كتاب
بصت على المشهد وقالت ياه
قد إيه الكون عجيب

ملفوظہ جنیدی

يا محفظة جندي

مرميه فوق الرمل

.....

فيكي صور أحباب

فيكي ياسين وحجاب

فيكي بريزه ورق

باهت عليها عرق

وفيكي صورة شاب

بيبص لي بعينه

طال من الكارنيه

في الميري كان خايل

وف جيبه كان شايل

مشط وقلم وجواب

ومحفظه بلاستيك

شاريها م العتبه

دلوقتى فوق الرمل

مفتوحه زى كتاب

من غير فرامل

أنا راكب بسكليتته
على منحدر مخيف
وكأن الساعة سته
صباحاً في الخريف
في طريق مجهول زراعي
ما أعرفش في نهايته
حاخذ حبيبي واشبك
ذراعه في ذراعي
والا حاتكون نهايتي
على أحجار الرصيف

.....

وكأني كنت حابس
آخر نفس في صدري

أو جاز كنت حاسس
حواليا شجر بيجرى
مجنون زى العجايز
فى سباق ما فيهبوش جوايز
أوراقه زى قلبى
مرعوبه تقع فى حجرى
واخد نفس وكاتمہ
لو سبته روحى تطلع
أعصابى شوك قنafd
والسهم فى قلبى نافد
لو نمت لحظه واحده
مؤكد المصير
وحتى لو مائتمش
مش راح تفرق كتير

.....

فى نهاية المطاف
أنا راكب فوق كتاف

شيطان ببدالات!
له فى دماغه قرون
تشبه دركسيون
عجلة سباق غريبه
على منحدر مخيف
ما اعرفش فى نهايته
حاوصل للجنه والا
حاتكون نهايتى جته
مجهولة العالم
على أحجار الرصيف

أبوياء وابني

شاييف عينين أبويا
فى عيون النونو إبنى
أتارى الدنيا قاعده
تهدم ف الناس وتبنى
ما بين لعب ومعارك
توسع بينا المدارك
وتضيق الدنيا فجأه
نرجع من تانى نحبى
شاييف عينين أبويا
فى عيون النونو إبنى

.....

لما ضحك لى بسسذاجه
قال لى على كل حاجه

فى الصورة بابا طيب
قاضى دمه قريب
إيده فى إيد الغلابه
حازم ويا الديابه
اللى اشتغلوا سماسره
قضاياهم عنده خاسره
لابس روب المداوله
من جوله يخش جوله
قدامه الناس علاوله
بصيت دوغرى ف عيونه
حسيت وكأنه نونو
أنا شفت أبويا نايم
فى سرير النونو إبنى!

العروسة

فستان زفاف خصره نحيل ع القد
لابساه عروسه واقفه فى الدكان
مانيكان خشب بهتان
وعينيها باصه لفوق لآخر حد
وكأنها بنوته فى الإعدادى
مستلفه من بنت الجيران فستان
علشان تروح النادى

نشاط

ياللا نلم الكراسى

ونشيل الكبايات

ونطبق الصوان

ونفك الدلايات

دا جواز والا تعازى

والا صوان انتخاب؟

لمرشح انتهازى

تاجر حشيش وتاب

.....

حتى الشيخ اللى رّوح

كان جاى عشان ينّوح


والا يكتب كتاب؟
أنا صاحب الفراشة
قلبي زى الفراشة
ماليش دعوة بضيفك
مايهمنيش ظروفك
لكن احب اشوفك
في نهاية المتمة
بتعد لى فى فلوسك
والأجرة تبقى تامّة
مايهمنيش سالفها
والا البعيد خاطفها
الشغل ماهوش خواطر
لامؤاخذه أصلى شاطر
فى العد والحساب
وان كان فرح جنابك
ألفين مبروك يا سيدى
وان كان عزا اللي جابك

أنا برضه بامد إيدى
فى الخالتين شد حيلك
فى سنانك حط ديلك

.....

آلوه.. آلوه.. آلوووووه
إثنين.. أربعه.. سته

أسيادى سيداتى
الدنيا فى كل حته
فرطاس مليون جيلاتى
تحت الشمس فى بؤونه؟
إزاي يتشال مئونه؟
ياتاكله مره واحده
يا بضيع فى لحظه واحده
زى رغاوى الصابونه



إدینى زفة

أنا أديب أبيض واسود
من عصر تليفزيون تليمصر
أنا مكحله من غير مرود
أو عمله مش من هذا العصر
إدينى زقة عشان أمشى
عرييتى رمسيس كحيتى
إدينى قرش ما تندمشى
علشان أروح على بيتى
ركبنى آله زمنيه
واضبطها ع السد العالى
إحدفنى فوق النوباريه
رجعنى تانى لعيالى
رجعنى لأبويا وأمى

وأخويا بيشد فى كمى
وف إيدى حنة عسليه
إدينى زقه عشان أمشى

.....

لو كنت عايز تراجعنى
فيه شىء وحيد بس واجعنى
إن الهزيمه حتميه
والانكسار على مدد الشوف
غطينى أجدع نغطيه
واسقبنى معلقتين م الخوف
علشان أعيش مذلول وسعيد
وان علقوا على بابى فانوس
طول ما المراكب واقفه بعيد
بتمد إيدها لجل أبوس
مليانه بالقمح معونه
فى سبيلها يتقاتلوا الخاليق
اسند لى زهرى يا عم الشيخ

وخذ بأيدي يا أبونا
دي الأرض مليانه زحاليق
بعد الأعادي ما قتلونا
بيحذفولنا باكو دقيق
إحنا الشعوب المطحونه
مرسوم لنا ع الأرض طريق
بره الحضاره البشريه
إدينى زقه عشان أمشي!

عربده

الكون بيشرب مخدر
والدنيا سكرانه طينه
وانا البخيل المبذر
تلقاني وسط السفينه
داير بانادي بمكبّر
على ضحكته تاهت حزينه

داير بانادي وانادي
أحفادي صبحم ولادي
وولادي وقعم رهينه
في إيدن جناب المفكر
وانا البخيل المبذر
تلقاني وسط السفينه

النخل طارح قنابل
والصبح ساعة عصارى
وحلمت إني باقابل
نفسى فى متاهة حوارى
فردت إيدى باسلم
سابنى وماردش سلامى
رميت سلاحى اللى تلم
ولعنت نفسى فى منامى
بصيت لوشى المعكر
لقيت عينيا حزينه
والكون بيشرب مخدر
والدنيا سكرانه طينه

وانا جنين كنت باسمع
ضحك البنات العذارى
واضحك معاهم وادمع
فى كل شارع وحاره

واسمع غناهم ملعلع
بيقول بصوت حلو سايح
كل اللي راح مش حاي رجع
كل اللي جاى برضه رايح
أكتهم دموعى واكور
نفسى فى ليل المشيمه
والكون بيشر ب مخدر
والدنيا سكرانه طينه
وانا البخيل المبذر
تلقانى وسط السفينه

مشاهد من خاکره غریفه

وكأني واقف في مينا
وبابيع صور تابلوهات
فيها معالم مدينه
وكلام بكل اللغات
وبنات سعيدة سجينه
في مراكب الأمنيات
وعلى الرصيف كنت بارسم
صوره لوطني اللي مات
فيها وشوش مستكينه
تشبه طيور الغابات
فيها السمك لونه فضي
باهت كما الذكريات
والصيادين قاعده تبكي

تستنى بكره اللى فات
خشب المراكب بيحكى
عن أحلى جنّيات
والشمس مجنونه تقدح
ولافيش بلابل بتصدح
أيامها كان قلبى يفرح
لما يشوف النبات
دلوقتى فى المينا بارسم
مناديل وداع أمهات
شاوروا جنود مش حاترجع
فى حرب بين جنرالات
راسمين بأيدهم علامه
بالوسطى والسبابات
وعلى الوجوه ابتسامه
متعفره بالبارود
بارسم قُبل طايّره تايّهه
كانت فى يوم عاخذود

لابس هدوم مش هدومي
وعينيا لون السكات
شاييل هموم مش همومي
باكتب قصايد رثاء
للبحر والوشوشات
علشان صحابي خانوني
وسابوني شاييل جنوني
تايه ما بين البارات
باكتب قصيده شجيه
أهديتها مره لصبيه
عاشت ما بين التلوج
وف إيديها ورده نديه
كان اسمها في المروج
الحب والعبوديه:

”لون السما الباريسييه
لون العذاب جوا قلبي

مين اللى قال يا صبيه
فين القدر مستخبى
ليه يا صلاح يا حبيبى
لونت دنيتنا بمبى
وانا كنت بارسم عذابك
غيمه سايقها مراكبى
فوق السما البارسيه

.....

شايفك فى قلب المحطه
فى كابينة التليفونات
جنبك عجوزه بشنطه
حواليها أربع بنات
وببضحكوا من قلوبهم
والمترو جاى من بعيد
وانتى عينيكى حزينه
رغم ان قلبك سعيد
رن الجرس جوا بيتى

وانا ما كنتش هناك
مرت سحابه عجيبه
رسمت وشوش يشبهونى
رسمت وشوش يشبهوكى
رسمت عذابك فى قلبى
فوق السما البارسيه

.....

دلوقتي واقف فى مينا
وبابيع مناديل وداع
مرسوم عليها مدينه
كان فيها تاجى اللى ضاع

میعاد الفارة قرب

صواريخ العم سام
جت فى الهدف تمام
رسمت منظر طبيعى
للعالم الجديد
بدماء سننى وشيعى
على جذران الصالون
فى فندق الرشيد

* * *

لو كنت مش مذاكر
الطيارات بتحدد
للمهرجان تذاكر

وقنابل ألف رطل
النار جواها فايده
كتبوا عليها العساكر

أساميههم باللاتينى
زى كروت المعايدة

قنابل الأعادى
قبل مات تقتل ولادى
ما بتسألهمشى أبداً
عن ملتى ودينى

صواريخ العم سام
جت فى الهدف تمام

.....

الدنيا حر موت
وانا بين أطلال بلادى
بعد الغارة العنيفه
زى المجنون بانادى
على مولانا الخليفه
فى التليفزيون جابونى
فى النشره الأجنيبه

نفس المشهد مكرر
والكاميرا هي هيّه
يمكن نفس اللي صوّر
أطلال العزيزيه
حتلاقي كل صوري
ملزوقه في ألبوماته
حتشوفني مره بابكي
جنب الناس اللي ماتوا
وتشوفني مره ثانيه
طفل في مخيماته
وتشوفني مره ثالثه
فدائي ببندقية

نفس المشهد مكرر
والكاميرا هي هيّه

كله يظبط ساعاته
يطفي تليفزيوناته
معاد الغاره قرب

للخلف در

سباك أمير أهدر دماء كام جدع
مانقولشي بيصلح في حنفيه!
وعلى الدفوف رقصوا بحيرة البجع
وقيفوها بمنتهى الحنيه
والمؤمنين إتميلوا بالجلاليب
والطبله دارت..
على واحده ونص
صوت الدفوف خدني وفجأه بابص
لقتني في مشهد مثير وعجيب
الشيخ في حفل الافتتاح بيقص
شريط حرير على مدخل الفردوس
وشفايفه فوق خد الشيطان بتبوس
واخدين سوا بوظ للصحافه تصور
قرصت نفسى دا حلم والا كابوس؟

وعينيا زاغت في الصفوف بتدور
نفسى أشوف واحد مانيش عارفه! .
الكل عفر دقنه ع الأعتاب
والرقاصات ع البدله لبسوا حجاب
وفيلم رابعه عادوه ميتين نوبه
وفبركوا أوبريت عن التوبه
كلمات ولحن مسيلمه الكذاب
ورابعه كانت ست مجذوبه
مالهاش فى ولا بنك ف سويسرا حساب

.....

نفسى أشوف واحد ماهوش مفقوس!
الكل راكب موجة المنهج
وانا نازل السلم وانا بانهج
قابلنى مصاص الدماء طالع
من دقنه فايحه ريحة البارفان
والجبه كانت من بيير كاردان
قال لى النهارده الدرس فى التلفاز

قال لى النهارده الدرس بالجنان
عن عذراوات الجن فى مكه
أنا قلت له كفايه كلام سكه
دا كلام شيوخ والا بتوع نسوان؟
.....

ونزلت ع القهوه أقابل نصر
أبو زيد واصلى معاه صلاة العصر
قال لى كلام موزون عن التفسير
الفقه بيعانى من الأساطير
والعمه مضبوطه على الفبركه
وأخذنى من إيدى لحد الصوان
من عينى نزلت دمعته زى الخبر
لما ابن خلدون فى السراى بكى
وأخذ عزابا فى جمال حمدان
.....

خرجت م الميتم عديم الأهل
ومشيت لغاية شارع التحرير

مليون كتاب مفروشه فوق الرصيف
مدروزه جهل صميم على تخاريف
واحد يقول لك إن بيض الديك
علامة للساعه ويوم الحشر!
والثاني والثالث بيلعبوا ببيك
بمذكرات إيفا وعذاب القبر
ولاحد كلف خاطره يكتب سطر
عن طفل بيعانى عذاب الحياه
تمانيه تسعه فى أوضه فوق السطوح
بيذاكروا على نور الضاروخ الجاز
وإذا كنت غاوى خل فى الألفاظ
الطفل ده هو جمال حمدان
وهو نصر أبو زيد
وهو طه حسين
اللى رماه الأزهرى بالكفر
إبنى وإبنك قلبهم لسه حر
مين غيرنا أنا وانت حايعمهم

من شخص ماشى عكس ربح التاريخ

متغاض وعرقه بشر

من كتر يأسه شخط فى وش الزمان

.....

للخلف در!

أغنية الألات الموسيقية

الآلات: إحنا الآلات الموسيقية
حانغنى غنوة جماعية
حاندندن كدا مع بعضينا
بيانو وتشيللو وفيولينا

البيانو: حاطلع ع السلم واتنطط
دو رى ماى فا صو لا سى
من غير ما صوابعى تتلخبط
سى لا صول فا مى رى دو
أنا أصلى بارسم وبأخطط
وبأحط اللمسة النهائية
على آخر أوبرا لشوبان

الآلات: إحننا الآلات الموسيقية

بيانو وتشيللو وكمان

التشيللو: أنا راجل مليون ووقور

لابس بدلة سهرة سموكن

بانحنى قدام الجمهور

قايم نائم بالبابيون

ومافيش عندي هدموم سبور

لما بانادي على أولادي

حنجرتي قوية وتينور

.....

بينى وبين الدنيا حوار

شاغلانى مسألة موسيقية

ماوصلتش فيها لقرار

لكن متأكد من نفسى

وأنا ماشى ببدة وسيجار

الكمنجات: راجل متمكن ووقور

من طبقة راقية وتينور

واقف زى الشجرة صبور

وكمنجات الدنيا فى ضله

الآلات: إحنا الآلات الموسيقية

بيانو وكمنجه وتشيللو

الكمنجة: أنا بنت شقية وعكرونة

باضحك وابكى وأنا بامرجح

سوبرانو لكن سفروته

وباغنى أوبرا وموشح

كل ما خضن فىا برقة

وتميل خدك على خدى

تسرق قلبى آخر سرقة

أديلك أجمل ما عندى

اسمى كمان فى الورق الرسمى

واسم الشهرة كمنجة واسمى
فيولينا ودا إسم رومانسى
كان اسمى فى الزمن المنسى

التشيللو (مقاطعا):

أنا احبك دائما تترسمى
جنبى فراشة فى حضن الفيل
واضحك لما انتى بتبتسمى
مع إنى مهذب وتقبل

البيانو: (مقاطعا)

وانا احب ألعب كدا وياكى
نبقى دويتو مالهش مثيل
لجميع الأزمان بيغنى
مش بس لعصرة وزمانه

الآلات: إحنا الآلات الموسيقية

ڪمنجه وتشيللو وبيانو

إحنا الآلات الموسيقية

حانغنى غنوة جماعية

حاندندن ڪدا مع بعضينا

بيانو وتشيللو وفيوليننا

حكاية الولد والبني

كان فيه ولد صغير
من طلعة النهار
على شط البحر يمشى
ويجمع الحار
ولما الشمس حمت
ينزل يعوم ويلعب
كل الدرافيل جيله
وعلى ظهرها بركب
وف يوم دخل جوه
فى الميه التركواز
لقى جنبه وهو عايم
قمقم إسود قزاز
مختوم بشمع أحمر
وعليه أعشاب كثير

منقوش عليه طلاسـم
وكلام يظهر خطير
صاحبنا قال لنفسه:
دا أكيد جواه رساله
من واحد فوق جزيرة
غلبان وحالته حاله
م البحر خرج بسرعه
شد الختم بسنانه
الشمس فجاء غامت
واتسمّر في مكانه
القمقم كان بيدلق
دخان إسود كثيف
اتشكل في النهايه
عفرت عملاق مخيف
بص لصاحبنا بصّه
منها طق الشرار
وشاله بين صوابعه
أصغر من الحار

وقال له: إنت عارف؟
أنا ليا ألف عام
محبوس جوا القزازة
من غير أكل ومنام
واللى حبسنى واحد
إنسى زيك تمام
وانا من ساعتها حالف
من قلبى اللى تاعبنى
أول إنسى حاشوفه
يوم ما ينفك سجنى
حاشفى غليلى منه
ها ها.. هاها.. ها ها ها
حظك وحش يا إبنى
.....
- إستنى يا عم جنى
إوعى تطبق إيديك
كدا برضه تنسى إنى
صاحب أفضال عليك؟

وانا اللي كنت فاكر
حاسمك شببك لبك
ألاقيك لجميلي ناكر
وحاتقتلني بأيديك؟
.....

الجنى كان مذاكر
كل علوم الكهانه
قال للولد وهو
بيعامله باستهانه:
شبيك لبك يا سيدى
يا عبدى وملك إيدى
كل اللي حاديهولك
إنك تسأل سؤال
وليك عندي إجابة
وابقى رديت جميلك
بمنتهى الكياسة
وبمنتهى التجابة
ومالكش حاجة عندي

لو بعدها قتلتك
ولا يمكن لوم يصيبني
ها ها.. ها ها... ها ها ها
حظك وحش يا ابني

.....
صاحبنا عصر دماغه
جت له فكره قويه
حاجيب للجنى داغه
بجنون وعبقريه
قال للجنى بتهكم:
سؤالى ليك بسيط
إزاي واحد فى حجمك
بيقرفص جواً قمقم
ويعوم بيه فى المحيط؟
إنت فاكرنى مغفل
والا فاكرنى عبيط؟
أنا قلت من البداية
إنك عامل لى حيله

ومألف لى حكايه
علشان تقتلنى غيله

.....

الجنى قال بسبطه
وينطه يا مبجل
راح داخل فى القزازه
بمنتهى العباطه
راح الولد قافلها
بمنتهى اللذاذه
ومنتهى البساطه
وقال له: يا عم جنى
تستاهل تبقى عندك
لألف عام كمان
دا جزاء عملك لى
حببت لى أساعدك
ما ادبتليش الأمان

العروسه الماريونيت

أنا عروسه ماريونيت
أنفع راجل وانفع ست
شد الخيط على طول تلاقيني
باضرب سلامات واتشقلبت
أنا عروسه ماريونيت

أنا مثل مسرح أصلاً
لكن مشدود من دراعاتي
وباضحككم فصلاً فصلاً
لما بتقطع خشباتي
أدواري مثيره وخطيره
مثلاً في الليلة الكبيره
كان اسمي الرئيس حنتيره
ولعبت في حي المنيره

تراجيديا روميو وجولييت
أنا عروسه ماريونيت

مين عنده لياقه بدنيه
مع إنه هفيه وسفروت؟
وبيضرب بالرجل بونيه
وبيضرب بالأيدي شلوت؟!
زى فتوات الحسينيه
مايهموش تضربه نبوت
مهما تعجن فيه وتلت
أصله عروسه ماريونيت

أنا عروسه ماريونيت
أنفع راجل وانفع سنت
شد الخيط على طول تلاقيني
باضرب سلامات واتشقلب
أنا عروسه ماريونيت

البحث الرسالة

كان فيه صببة أموره
بتحب ترسم بالألوان
فى إيدها فرشنة مسحورة
من عهد سيدنا سليمان
بالفرشة لو رسمت كوره
تقدر جيب بيها الإجوان
ولما ترسم تفاحه
تتمايل الأغصان بيها
ولو تقرب تلاقبها
ريحتها باينه وفواحه
تقعد تاكلها فى البستان

البنات كانت مبهوره
رسمت لكل جماد صوره

ولما رسمت عصفوره
طارت وحطت ع الأغصان

باباها كان حداد غلبان
طول النهار والليل شقيان
واقف في قلب النار مسكين
من الحديد يعمل تفانين
ويغنى على صوت الترنين
بالمطرقة فوق السندان

البنـت صبحت مغروره
شافت باباها بيعافر
يتعب ويعرق ع الآخر
علشان بيعمل حدوه وسيف
وهى بالفرشه فى لحظه
ترسم حصان عنده حوافر
بيخبط الأرض ونافر
عروقه وبيجرى كما الطيف

”الموهبه مش لعب عيال
الموهبه حاجه عظيمه
لو خدتها كدا باستسهاأل
حتلاقى عواقبها وخيمه“

.....

البننت مرة على الأبواب
رسمت فيران وقطط وكلاب
علشان تضحك أصحابها
ولما جريوا لحد الغاب
رسمت لهم نمر بأنياب
النمر بص لها بحده
الفرشة وقعت من إيدها
أصحابها جريوا على باباها
وقبل ما حد يقول له
النمر كان خلص شغله!

..

ودى نهاية الحدوته

جوز أراغب

ياريتنى جوز أرانب
أو حتى أرنبين!
حلوين زى الأجانب
وف حبك توأمين
واحد عاشق جمالك
والثانى كمان كذلك
يامنجى من المهالك
أنا عقلى راح لفين
ياريتنى جوز أرانب

واحد منهم مغنى
والثانى طبعه فنى
حريفه فى التمنى
لكن الحظ شين
ياريتنى جوز أرانب

واحد منهم فلاتى
طول الأوقات يهاتى
والثانى بتاع جيلاتى
فى سيدنا الحسين
يا ريتنى جوز أرناب

واحد سارق سريقه
والثانى شيخ طريقه
لكن عايزه الحقيقه
لاتنين مش غدارين
ياريتنى جوز أرناب

أرناب على اليمين
أرناب على الشمال
أنا كنت جوز أرناب
عاشقيناك فى الحلال

بہلوانانہ السیرک

إحنا بهلوانات السيرك
نرقص دبكّه ونرقص جيرك
نمشى بالعجله على السلك
وايدينا بتضرب سلامات
إحنا بهلوانات السيرك
إحنا إحنا البهلوانات

نركب موتوسيكلات وهميه
وننط سلالم موسيقيه
نتكعور من فوقها وهيا
دو ري مي فا صول لاسيهات
إحنا يهلوانات السيرك
إحنا إحنا البهلوانات

إحنا مع بعضينا زمايل
آخر لخمه وحالنا مايل
وبنعمل فى بعض عماليل
زى قروء الجبللايات
إحنا يهلوانات السيرك
إحنا إحنا البهلوانات

أجمل ما فى الدنيا شقاوه
عفرته متنقيه نقاوه
ضحك برىء بذكاء وغباوه
وإجورنا هي الضحكات
إحنا يهلوانات السيرك
إحنا إحنا البهلوانات

جمهورنا بيحب يشوقنا
ظرفاء دايماً رغبم ظروفنا

نتبهدل وندارى كسوفنا

خلف الماكياج والماسكات

إحنا يهلوانات السيرك

إحنا إحنا البهلوانات

إحنا إحنا البهلوانات

الخواجہ بیچو

خواجه على فلاح وحويط
ربعين لنيم على نص عبيط
وابو لمعة لو بطل تنطيط
على قفايا أروخ وما اجيس

مصرى يونانى واخب الناس
وباقول يا مرسى يابو الأباس
فيوزاتى ضاريه مع اللكباس
وملمسه آخر تلميس

أبو لمعه نازل فشر مخيف
بيحط مخى فى نص رغيغ
يركبنى ويقذف تقديف
نوصل لحد المينابوليس

خواجه ومصديق بالله
إن الهرم أبو لمعه بناه
فى نص ساعة وبنى وياه
تلاته برج إيفل فى باريس

مع سمعة فى سرابة المجانين
ع الحيطه لازق وبنى سنين
باسمع فى أصوات مش باينين
بتقول زمانكو كوميديا فطيس

ساعات فى قلبى باحس بهم
دكتور شديد قاس ضغط الدم
وقال يا خويا بلاش تهتم
الفن أصبح سعره رخيص

عمرى ماخذت بطولة فلم
لكنى موجود زى الحلم
فى السيماء والمسرح أنا نجم
وولادى مالين الكواليس

فیروز و انور وجدی

أنا وانتى فنانين
بنحب القرفشه
طفلين صغيرين
بننام من غير عشا

أنور وجدى دا اسمى
ودنى موسيقيه.. يوك
لكن غنيت بجسمى
وبرجلى وانا بازك

واحنا فى الكراكون
يا طفله بألف ست
بانفخ فى الساكسفون

وتدقى الكلاكيت
أنا بيع البكش
غلبان وبتاع خناق
شعري طار واتنكش
وانا باجرى فى الزقاق

فجأه قابلنا بيه
قاعد جوا التياترو
ياكل هوا بانيه
ويقلب فى دفاتره

ياكل هوا سباجيتى
بالشوكه بحرفنه
ويقول باردون يا ستى
فوتى بعد ميت سبه

غنينا سوا بياتى

فيوزات دماغه شاطو

وميت جنبه يوماتي

اتكتب الكونتراتو

لما لقينا الريال

فرحنا من قلوبنا

طب ليه البخت مال

لما ثقلت جيوبنا

الحظ رمى في طريقى

ملوخيه بالأرانب

جاني أبوكى الحقيقى

عايز م الحب جانب

فى المحكمة جابوكى

قلتى ألفونسو بابا

وشاورتى على أبوكى

وكأنه زعيم عصابه

والفيلم ده يا ساده

جاله انقسام ثنائى

ياسمين ودهب وغاده

واللى يدور يلاقى

وانا وانتى فنانين

بنحب الفرقشه

طفلين صغيرين

بنام من غير عشا

بشارة واكيم

•

أنا إسمى بشارة
وكل كلامى إلك يا جارة
لو تسمع حبه
حتاكل كبه
حتقول أنا شامى؟
حقولك لأ
أهى بس أسامى
لكين الحق
أنا أصلى صعيدى ومصرى صميم
رغم انى بشارة وابويا واكيم

* *

أنا عندى جارة
وكل شطارة

وإلى مزرعة
كان الله مع
الخيال اللي بترمح فيها
فى ثلاثين يوم ما تعديها
حتقول فشار دا مش طبعى
دنا بس باطرقع بصوابعى
بايرم شنباتى المفتولة
وبارى بناتى الشملولة
وباحط توابل على بهارات
وباعبى قوافى فى برطمانات
تبوله من الدرجة الأولى
وتشوف الفيلم
تقولشى دا علم
برينط وباحكى فى الأفلام
وكأنى جاى من بر الشام
مع إنى صعيدى ومصرى صميم
رغم انى بشارة وابويا واكيم

ماری منیب

إدبنى أكثر يا مارىكا
يا مارى منيب يا مزىكا
يا حماتى على مر الأجيال

عفرت حماتى فى سينما الشرق
والضحك شغال رعد وبرق

الناس بتضحك سواسية
وما فيش فروق اجتماعية
وكأننا فى حضنك أطفال

إدبنا أكثر يا مارىكا
يا مارى منيب يا مزىكا

يا حماتنا على مر الأجيال

فى المسرحية الصوت مسوح
والصورة أحيانا بتروح
ولسه فيها الروح برضك
ح اموت من الضحك فى عرضك
اطفيها يا ابنى انا عندى عيال

إدينى أكثر يا ماريكا
يا مارى منيب يا مزيكا
يا حماتى على مر الأجيال

أعوعا.. شغلتي سواقه
عربية أركب أو ناقه
نفسى اتكرش آخر كرشه
وهى مديه الطرشه
أقول يمين تسمعها شمال

إدبله أكثر يا ماريكا
يا ماري منيب يا مزيكا
يا حماته على مر الأجيال

لصوص لصوص لكن ظُرفا
وبيخرموا بلاط الغرفه
طلعتى ليهم زى قدر
عانس وسيدها الجنى حضر
وأمرها تتجوز فى الحال

إديهم أكثر يا ماريكا
يا ماري منيب يا مزيكا
يا حماتنا على مر الأجيال

أنا النابلسى.. أهلاً بيك
مدلكاتى الناس الشيك
قلتى جتك نيله وشايفك

بتمصمصیلی بشفايفك
عیب یا مدام دا شيء بطل

إدبله أكثر یا ماریکا
یا ماری منیب یا مزیکا
یا حماته علی مر الأجيال

إدینی أكثر یا ماریکا
یا ماری منیب یا مزیکا
مسحتی کله بأستیکه
یا حماتی علی مر الأجيال

حسن فايق

متنرفز ورايق

وحسن وفايق

جنتلمان وعايق

وابن بلد وباشا

ضحكتك عجيبة

ولقلبي قريبة

وشك كله طيبة

بينقط بشاشة

ومراتك قوية

وأرستوقراطية

ساحبة عريس لقيّة

أوحش م الوحاشة

بنتى جمالها آية

آخر عنقوداية

إزاي فى الرواية

تتجوز عماشة؟

ح اشخط شخطة سيما

فى بنت القديمة

وامنع الجريمة

واضحك بانتعاشة

أكثر شىء ناعبنى

حلموس ده مش ابنى

شيله معاك وسيبنى

وانا اجيبلك بغاشه

نايلون بلابيعو

البلا: نبيعه
على طول في السريعو
شنيك يتلاشي

هاردلك يا هاردي
دي الماتشات في أرضي
قاس الترزي عرضي
على قد القماشنة

كل كاراتاراتي
يا كوميدياناتي
بعد يوم وفاتي
طلعت ع المعاشنا

المحتويات

7	ميراث
13	عالم تانى
19	حوار
25	مجهول
29	حزن الجليل
33	البحر
37	محيط
41	كلب كانيش
45	طشاش
49	بعد سماع الصفارة
53	الموجة
59	استرحام
63	خدعة
67	مشوار
71	عالم
75	محفظه جندى
79	من غير فرامل
85	أبويا وابنى

89	العروسة.....
93	تشطيب.....
99	إدنى زقة.....
105	عريضة.....
115	مشاهد من ذاكرة عريضة.....
119	ميعاد الغارة غريضة.....
125	للخلف در.....
133	أغنية الآلات الموسيقية.....
141	حكاية الولد والجنى.....
149	العروسة الماريونيت.....
153	البنت الرسامة.....
159	جوز أرانب.....
163	بهلوانات السيرك.....
169	الخواجة بيجو.....
173	فيروز وأنور وجدى.....
179	بشارة واكيم.....
183	مارى منيب.....
189	حسن فايق.....

صدر مؤخر عن (أصوات أدبية)

- ٢٦٨- مكاشفات شخصية شعر : بهاء جاهين
٢٦٩- أقانيم قصص : اسماعيل البنهاوى
٢٧٠- مرايا الذات الأخرى رحلة : صبرى حافظ
٢٧١- ديوان غزالى كابتن غزالى
٢٧٢- الصنم رواية : أشرف الخمايسى
٢٧٣- منازل القمر قصص : سمية رمضان
٢٧٤- مواقيت البهجة قصص : عزت القمحاوى
٢٧٥- عضم خفيف شعر : سعدنى السلامونى
٢٧٦- حافة الود رواية : نبيل نعوم
٢٧٧- صانع الصدمات قصص : أسامة خليل
٢٧٨- السبعة شعر : عادل عزت
٢٧٩- عشرين سنة على سلم المترو.. شعر : حمدى عبد العزيز
٢٨٠- ضرورة الكلب فى المسرحية... شعر : جرجس شكرى
٢٨١- نجع السلوة رواية : أحمد أبو خنجر
٢٨٢- طائر الفخار شعر : محمود نسيم

- ٢٨٣- كائنات هشة لليل رواية : صلاح والى
- ٢٨٤- قبض الريح قصص : شحاته عزيز جرجس
- ٢٨٥- أغادر جسدى شعر : أحمد السواركة
- ٢٨٦- بعدين شعر : صلاح الراوى
- ٢٨٧- الوفاة الثانية لرجل الساعات..... رواية: نورا أمين
- ٢٨٨- عبير الكمنجات شعر : عزت الطيرى
- ٢٨٩- نتهجى الوطن فى النور شعر: سمير الفيل
- ٢٩٠- رائحة النعناع رواية : حسين عبد العليم
- ٢٩١- امرأة يروق لها البحر..... شعر : عبد الناصر هلال
- ٢٩٢- قوة الحقائق البسيطة..... شعر : عزت عامر
- ٢٩٣- شهيد الوطن شعر : متولى عبد اللطيف
- ٢٩٤- الكوشة رواية : أمين ريان
- ٢٩٥- عالم ثانى شعر : عمرو حسنى

رقم الإيداع : ٢٠٠٠/٢٠٣٤

قسمة اشتراك
إصدارات الهيئة العامة لقصور الثقافة

الاسم :
العنوان :
رقم التليفون :
حالة بريدية رقم : باسم الهيئة العامة لقصور الثقافة بمبلغ :
التوقيع :

م	اسم السلسلة	موعد الاصدار	قيمة الاشتراك ٦ اشهر	قيمة الاشتراك سنة كاملة
١	اصوات ادبية	نصف شهرية	١٢	٢٤
٢	إبداعات	نصف شهرية	٦	١٢
٣	كتابات نقدية	شهرية	١٢	٢٤
٤	أفاق الترجمة	شهرية	١٢	٢٤
٥	أفاق الكتابة	شهرية	٦	١٢
٦	الذخائر	شهرية	٣٠	٦٠
٧	ذاكرة الكتابة	شهرية	١٨	٣٦
٨	مطبوعات الهيئة	شهرية	١٢	٢٤
٩	الدراسات الشعبية	شهرية	١٢	٢٤
١٠	عين صر	شهرية	٦	١٢
١١	مجلة الثقافة الجديدة	شهرية	٦	١٢
١٢	مجلة قطر الندى	نصف شهرية	١٦	٣٢
١٣	مجلة أفاق المسرح	فصلية	٤	٨
١٤	أفاق الفن التشكيلى	شهرية	٢٤	٤٨
١٥	الجوائز	شهرية	٦	١٢
١٦	أفاق السينما	فصلية	١٨	٣٦

ضع علامة (✓) أمام السلسلة التي تريد الاشتراك فيها في المربع الخاص بمدة ستة أشهر أو سنة كاملة

ترسل على عنوان الهيئة العامة : ١٦ أ ش أمين سامى - قصر العينى - القاهرة

ت : ٣٥٦٤٨٤١ - ٣٥٦٤٨٤٢ - فاكس : ٣٥٦٤٢٠٢

الرقم البريدى : ١١٥٦٢

شركة الأمل للطباعة والنشر
(مورافيتلي سابقا)